

BIOGRAFIA-BERRIAK

(Karlos Santamaria mintzo da):

Ni Easo kalean jaio nintzen, «Minoría vasco-navarra»ko Izeta gogoratzen duzu?, haren etxeen, Izeta etxea esaten zioten, 1909 urtean.

Nire aita oso berandu ezkondu zen, eta seme-alaba asko izan zuen, ni nintzen txikiena. Zortzi edo bederatzi izan ginen anai-arrebak, ez dakit ondo. Beno, zaharrenak ez nituen ezagutu, batzuk, orduan haurren hilkortasuna handia zen eta batzuk txikitau hil egin ziren. Aita nik uste dut 1854 urtean jaio zela. Eta begira, Burgosko Seminarioan zegoen eta bera karlista zen, eta Seminarioa utzita edo ez dakit nola, hona etorri zen, Euskal Herrira, «a defender los derechos de Dios». Aizul!, orduan hola esaten zen. Jainkoa ez zen nahikoa bere defentsa berak egiteko eta besteek egin behar..., horrela etorri ziren Jainkoa defendatzea. Nire aita, beraz, Burgostik etorri zen. Ez lanera edo, gerra egitera etorri zen Euskadira. Orduan, gerra egin zuten, galdu ere egin zuten, eta Frantziara joan behar izan zuten. Frantzian bizi izan zen, ez dakit noiz arte, oso gaizki, ze realistek edo monarkikoek lagundu laguntzen zituzten, baina halere oso gaizki. Eta nire aitaren ideiak, bera oso irakurzalea zen, piska bat aldatuz joan ziren orduan, piska bat liberala bihurtu zen. Eta utzi, eta etorri egin zen, Bizkai aldera, Balmasedara, eta Balmasedan prokuradore bezala hasi zen lanean. Eskribaua edo prokuradorea.

Bestaldetik nire ama. Historia oso konplikatua da nire familiakoa, interesantea baina konplikatua. Nire amaren familia euskalduna zen, euskaldun osoa. Nafarrak ziren, Aranokoak. Badakizu, Arano, Hernani gainean, han Ansa asko dago. Eta ez dakit zer gertatuko zen, nire aitona Jose Ansa eta bere familia osoa, orduan Altsasu guztiz euskalduna zen, Altsasura joan ziren bizitzera. Liberala zen Jose Ansa. Hemen aldreibes da kontua, nafarra eta liberala da amaren aita. Jakina, gero gerra etorri zen, eskapatu behar izan zuten, eta, hanka!, bera

Donostiara etorri zen. Badakizu nola zen, inguru hau, Orio, Donostia, liberalak ziren, eta denbora hori guztia nire ama hemen zegoen, gerra karlistan. Bonbardaketa eta kanpaina eta hori guztia, berak askotan kontatu zidan. Orduan, gero, nire amak maistra karrera egin zuen. Hiru ahizpa ziren eta hirurek maistra egin zuten. Iruñean egiten zuten, hemen ez zegoen maistra egiteko. Oposizioak Valladoliden egin, orduan Valladoliden egin behar ziren oposizioak, eta Balmasedan eman zioten plaza. Eta hortik etorri zen, kastellanoa, Burgostik etorria eta karlista, eta euskalduna, nafarra eta liberal baten alaba, nola elkar ezagutu zuten eta ezkondu ziren, eta hortik etorri da gure familia.

Ezkondu eta geroago Bilbora joan ziren bizitzera. Nire anaia batzuk Balmasedakoak ziren, beste batzuk Bilbokoak. Eta azkenik Donostiara etorri ziren, ze, nire amak beti Donostiara etorri nahi zuen berriz ere, eta Easo kalean jarri ziren bizitzen, eta horregatik bi anaia gazteenak donostiarrok gara.

Halaxe dira gerrak eta gauzak, nola familiak konpontzen eta deskonpontzten diren.

Beno, ni txikiena nintzelako, dena etxean ikasi nuen txikitán, irakurtzen, idazten, eta dena. Aita, ama, anai-arrebak, denak nituen maisuak eta maistrak. Frantsesa txikitán ikasi nuen, etxean. Arreba Maritxuk oso ondo zekien frantsesa eta berak irakasten zidan. Nire lehenengo irteera etxetik eskolara Batxilergoko bigarren kurtsoa egiteko izan zen, Marianistetan, «Colegio Católico de Santa María». Badakizu zergatik duen izen xelebre hori, «Católico»? Marianistak, hona etorri zirenean, «con sombrero de copa alta» ibiltzen ziren. Nire denboran ere oraindik mariunistek bonbina eramatzen zuten, oso elegantea, lebitarekin. «Los levitas» deitzen genien ni ikasle nintzela. Ba, esandakoa, «con sombrero de copa alta» etorri ziren mariunistak, eta jendeak pentsatu zuen tipo arraro haiiek protestanteak zirela, eta jendea esaten hasi zen protestanteak etorri zirela, eta hola. Orduan «Colegio Católico» ipini zioten izena. Eta nik hor egin nuen batxilergo dena. 1924 edo 25 bukatuko nuen. Nik berehalaxe matematika egin nahi nuela erabaki nuen, asko gustatzen zitzaidan, eta matematika estudiatzan hasi nintzen, Madrilen, Facultad de Ciencias Exactas. Orain asko dira, baina orduan holako gauzak oso jende gutxik estudiatzan zituen. Hemen inork ez, nik bakarrik, hori da egia. Bainaz nintzen denbora guztia Madrilen egoten. Niri Madril sekula ez zait gustatu. Orduan, denbora bat hemen, beste denboratxo bat han, horrela egin nuen karrera guztia, bost urte, eta gero doktoretza kurtsoa, eta tesia Rey Pastorrekin prestatu nuen, eta ari nintzen eta gero orduan gerra etorri zen eta dena nahastu zen. Rey Pastor hori izen handiko matematikaria zen. Oso sinpatikoa, errioxarra, eta benetan argia. Rey Pastor ez zegoen

Madrilen, Argentinan zegoen irakasle, Facultad de Ciencias e Ingeniería-n. Han bazegoen, hemen ez zegoen Ingeniaritzako Fakultaterik, baina Buenos Airesen bai, eta Rey Pastor hara joan zen profesore. Beraz, Rey Pastor ez zegoen Madrilen, baina urtero etortzen zen eta ni berarekin hasi nintzen lanean.

«Baina ez da posible», esaten zidan berak, «zu Donostian, ez duzue bibliotekarik, ez duzue ezer, ez da posible ezer egitea», esaten zidan. Beno, zer egingo dugu, ba? Nik proposatu nion orduan, hemen zerbait sortzea Eusko Ikaskuntzaren babespean. Eta hasi ginen, eta orduan eskutitz bat egin zion berak, Rey Pastorrek, Eusko Ikaskuntzari, esanez nola hemen zientzialari batzuk bazeuden, eta ez zela posible horrela jarraitzea, eta proposatu zien Centro de Estudios Científicos bat sortzea. Horrela eratu genuen Eusko Ikaskuntzaren babespean Centro de Estudios Científicos hori eta hasi ginen ikastaroak ematen eta hori guztia, 32 edo 33 aldera izango zen, eta aldizkari bat ere egiten genuen, *Revista del Centro de Estudios Científicos*. Diputazioan badago. Erdaraz, jakina, ez orain *Elhuyar* eta bezala. Orduan ezer ez zegoen euskaraz. Badakizu zeinek kolaboratzen zuen? Orduan oso gaxtea zen, Anbrosi Zatarain. Eta ez duzu pentsatuko zer ezizenekin: «Basati»!

Euskara nik Toribio Altzagarekin ikasi nuen, Errepublikan, Maria Dolores Agirrek ematen zigun eskola. Pertsonalitate handi bat zen Toribio Altzaga, pertsona handi bat, eta Deklamazio Eskolan euskarako eskolak ipini zituen. Donostian ez zegoen beste euskal kulturako bizitzarik Eskola hori baino. Teatroa antolatzen zuen, etab. Baserritarren gauza bezala ikusita zegoen euskara. Mezak ere, goizeko seietan egoten ziren euskaraz, «para las muchachas», goiz-goiz, neskameak joateko. Beste euskal kulturarik ez zegoen Donostian.

Jende asko elkartu ginen, eta Doktore Oñate Jauna Donostiako Institutuan katedratikoa zen, hori izan zen gure aurreneko zuzendaria Estudio Zientifikoen Zentroan. Lokala behialako Palacio del Vino-n eman ziguten. Hori non zegoen? Nola dago orain Orly hotela? Orduan ardoaren duana edo erreenteria zegoen hor, alondiga, hor egoten ziren upelak pila bat eta sekulako ardo usaina egoten zen etxe guztian. Hortxe eman zizkigun Diputazioak lokalak. Eta Usabiaga, *La Voz de Guipúzcoa*-ren jabea, Industriako Ministra zen, eta etorri zen inauguratzera, eta tarari-tarara dena oso dotore, baina gero berehalaxe Mugimendua etorri zen eta denak kanpora.

Bizitzeko eta dirua irabazteko, karrera bukatu eta segidan matematikako kurtsoak ematen hasi nintzen, Marianistetan, Institutuan, beste leku batzuetan, eta batez ere ikasle talde bat edukitzten nuen neure etxearen, ingeniaritza ikasi nahi zutenak matematikan prestatzeko. Prestatzen nituen, Bilbora lagun egiten

nien azterketetara, eta holakoak izaten ziren nire lanak. Ni ez nintzen pertsona ezagun bat, nire sinpatiak banituen bando bateko edo bestekoentzat, baina zientzialari bat besterik ez nintzen, ezezaguna, eta gerra etorri, eta ni hemen geratu nintzen. Bando bat eman zen edo ez dakit, ordena zegoen, mundu guztiaik zerbait egin behar zuela, lekuren batean aritu behar zuela. Zer egingo dut, zer egingo dut?, joan nintzen Institutura, eta esan nion Don Francisco González Maisuari, orduan direktore zegoen, iruditzen bazitzaion, nik lagunduko nukeela profesore bezala, eta horrela hasi nintzen eskolak ematen, beno, «como interino gratuito», ez irabazpide batekin. Ni joan nintzen Institutura momentu hartan, gauza bat egitera, beste bat ez egitearren, jakina, hori da egia, eta ni gustura. Baina interino gratuito izendatu eta berehala, expediente bat egin zidaten, eta pliego de cargos bidali zidaten etxera esanez, erdaraz esango dizut: «Se le señala como simpatizante del nacionalismo y que cuando se le habla del Movimiento Nacional se expresa con bastante tibieza». Hemen eduki behar dut paper hori nonbait jasota, baina orain etxe dena paperez beteta dago, ez dakit non edukiko dudan. Klaro, denok kezkatuta, eta orduan, González oso gizon ona zen eta, «begira, badakizu zer izango den onena? —esan zidan—: zuk errenuntziatu karguari eta kito», eta hola egin nuen, eta bera bakean utzi zuten eta niretzat ez zuen jarraipenik izan istorioak. Orduan, zer egin? Norabait joan behar.

Beno, ni soldadu joan gabekoa nintzen, inutil nintzen zerbitzu militarrera-ko. Hau da, nik ez nuen soldadu joan nahi, ez dakit kontu hauek esatea ba al da-goen, ezta?, baina nolabait konpondu nintzen, Iruñera joan eta piska bat inutil bistagatik izateko eta soldaduskatik libratzeko. Nire anaia Iruñean bizi zen, jende askorekin zuen harremana eta harekin konpondu nuen inutil izateko. Baina gerra etorri zen eta inutil denak errebisatzen hasi ziren. Ikusi nuen plaza batzuk eskaintzen zirela zerbitzu meteorologikoan lan egiteko, eta han sartu nintzen, eta meteorologoak nola behar zitzutzen, hartu ninduten, eta han egon naiz gero lanean erretiratu arte.

Uztailaren 18an gogoratzen naiz solas bat nola eduki genuen Eusko Pizkunden Jose Maria Lasarterekin, EAJko Diputatua zen, eta egun horretan ni Javier Elosegirekin nengo-en —Javierrek El Casino Eusko esaten zion, kafea hartu eta jostatu eta ezer ez egin, omen zelako han egiten zen guztia— eta Lasartek, «ez da ezer pasatzen, jeneral bat da, ez dago zertan kezkatu», esaten zuen. Baina nik, kalean tiroak entzuten zirela-eta, ikusi nuenean, hartu andrea eta umea, ordurako ezkonduta nengo-en, eta Aizarnara joan ginen. Azkeneko momentuan Eusko Pizkundeko baziideen zerrendak-eta desegitea lortu genuen behintzat. Aizarnakoa ere luze kontatzekoa genuke, baina hobe uztea. Donostiatik hara

joan ziren Dunixi Azkue, Pako eta Pepe Villar nebak, Gipuzko Buru Batzarreko burua zen Villarren anaiak zirenak, eta jende asko, asko. Eta han egon ginen, ea zer ikusiko, halako batean errekeeteak heldu ziren arte. Mendian behera errekete kolumna bat herrian sartu zen, eta kapitainak Udaletxeen bere diskurtsoa euskal karaz egin zuen, «Gora Euskal Herria!» hoska bukatuz, eta gu oso pozik mundu guztia, oso ondo. Egun batzuk geroago besteak etorri ziren eta dena izorratuta. Ni atzera Donostiara etorri nintzen eta benetan jendea izututa zegoen hemen. «Baina gizona, zer zabiltza zu bandera ipini gabe!», ikusi orduko esan zidan Azkueren emazteak ikaratuta. «Ibili zaitez kontuzago, ez dakizu-eta hau nola dagoen, edozer gauza pasa dakizuke!», eta halaxe zen, izan ere, baina hobe izango dugu hori uztea.

Nire lan guztia beti kulturala eta irakaskuntzakoa izan da. Gerra ostean, 1940 edo 41 aldera, Javier Elosegirekin, Centro de Estudios Superiores sortu genuen, Círculo de San Ignacio-n. Javier Elosegia hau, oso abertzalea, Joseba Elosegiren anaia zen, Francoren aurrean bere burua su emanda bota zuena. Geratu den tragedia da, Javierrek gerra Francoren bandoan egin behar izan zuela, eta bere anaia Josu berriz frontean frankistek hil zutela. Gerrako gauzak. Bizi-kletako istripu batean hil zen gero Javier. Javierrek eta biok, bada, kontratu bat sinatu genuen jesuitekin. «Jesuitekin kontratu sinatuak eduki behar dira beti», esaten nuen nik, eta kontratua egin genuen, ez zait inoiz damutu. Irakaskuntza zientifikoaren ardura, kontratu horretan zegoenez, gurea izango zen, eta estudianteen arta morala eta erlijiosoa jesuitek izango zuten. Eskolak ez zeukan inolako ofizialtasunik hasieran. Bilboko Ingeniaritza Eskolarekin adostasunean, guk estudianteak diciplina zientifikoetan prestatzen genituen eta azterketak Bilbon egiten zitzuzten. Gero legeria bat etorri zen, holako eskolei anexoak izatea agintzen ziena, eta Ingeniaritza Eskolak oso pozik asoziatuaren aitorpen bat eman zigun, ofizialtasun horixe besterik ez zeukan. Mutil asko eta asko pasa da hortik, Gipuzkoako ingenieri gazte gehienek aurreneko ikasturteak hor egin zitzuzten. Eta horrela, krisi handia sortu arte, Aita Errandonearekin-eta, alegia, Iruñekoa fundatu den arte, eta orduan jesuitak iratzartu dira, Aita Errandonea-eta, zerbait egin beharra dago azkar, etab., etab. Orduan larri zen hemen jendea. ESTE orduan sortu da, Escuela Superior de Técnicos de Empresa, eta EUTG, izen hori neuk asmatu bainuen. Hasieran EUG zen, Estudios Universitarios de Guipúzcoa, T gero erantsi diote. EUGn ni Zientzia Saileko dekanoa izan nintzen zenbait urtetan, eta lehen Centro de Estudios Superiores-en egiten genuen lan bera egiten jarraitu genuen, plan garatuxeago batekin eta hobeto orain, hori bai. ESTE ez, ESTE eskola guztiz beregaina zen, ezagumen ofizialik gabekoa batere, eta bere jokoa egiten zuen. Urteak eta urteak hor jarraitu dut

nik lanean, Nafarroako Unibertsitatearen peko Ingeniaritza Eskola Donostian kokatu zen arte. Orduan, Ingeniaritza Eskola batekin Donostian bertan, gure Sailak eginkizunik ez zuela-eta, denon adostasunez, etetea erabaki genuen.

Donostian nik erabili dudan ekitaldi kultural garrantziskoena, Elizarekin, Donostiako Solas Katolikoak izan da. Solas Katolikoekin 46an hasi ginen. Beno, lehenago, hau da, gerra aurrean, hemen Ikastaro Internazional batzuk eginak ziren, nahikoa interesgarriak. Amintore Fanfani eta etorri ziren, eta Mathieu Akizeko apezpikua, esaterako, besteak beste. Eta ondoren Solas Katoliko batzuk proiektatu ziren 36rako, mariunistan. Baino gerra etorri zen eta ezin izan ziren gauzatu. Berriro gerra ostean ideia berrartu denean, nik ez dakit komeni den kontatzea, historia konplikatu bat izan da hori. Nik esan egingo dizut eta gero zuk ikusi. Momentu horretan muga itxi-itxita zegoen, enbaxadak erretiratuta zeuden eta dakizun hori guztia, kinka zaila zen, atmosfera itogarria. Gobernuari, jakina, hemen askatasuna bazegoela, irudia ematea kanpora, interesatzen zitzzion; eta guri, kanpoko munduarekin harremanean sartzea barrukoak, interesatzen zitzraigun. Aho biko arma zen. Orduan Ikastaroen antolaketan ibilitako batzuk, eta zehazkiago nik neuk pertsonalki, nota bat aurkeztu genion Artajo ministroari, zein baldintzatan hasiko ginatekeen berriro. Eta baldintzak ziren, erabateko askatasuna egotea guk nahi genituenak gomittatzeko solasetara, eta erabateko askatasuna bakoitzak nahi zuena esateko biltzar aretoan. Baldintza horiekin, Gobernuak onerizten bazion, guk bultzatuko genituela Solasak. Eta horrela hasi ginen. Hau da, Solasak ofizialki Diozesiaren obra ziren, Gotzainak berak fundatuak eta kudeatuak. Jatorriz Donostiako Solasak Mateo Muxikak sortuak dira eta Diozesiko Buletinean hor egon behar du nonbait sorkuntzaren albisteak. Gero, han ibilitako hondartxook —ze, jende asko eta ezberdina ibili ginen hasieran, Luis Lojendio, etab., gero traiektoria oso diferenteak izan zituen jendea—, esango nuke gehienbat Herreraren inguruko jendea ginela izpirituan, Yarza apaiza eta, gazte katoliko kezkati mordo bat. Asociación Católica Nacional de Propagandistas-ek ikastaroak, irakurketak, konferentziak antolatzen zituen, eta horren inguruan ibiltzen ginenak. Donostian jendeak *El Pueblo Vasco* eta *La Voz de Guipúzcoa* irakurtzen zituen gehiena, nik *El Debate* irakurtzen nuen, baina oso jende gutxik irakurtzen zuen hemen. *El Debate*-k problemak planteatzen zituen. Jauntxo katolikoek *La Constancia*, egunkari integrista. «*La Constancia*, periódico sin sustancia» esaten genuen. Nik horrela hartu nuen nire formazio erlijiosoa: konferentziak, irakurketak, beti izan naiz irakurzale handia, eta nire aitaren bibliotekako liburuak irakurtzen egoten nintzen txikitatik aspergabe. Eta gazte katoliko kezkatuak ginen, zerbait egin nahi genuen —eta hemen geratzen ginen batzuk, bada, horrela hasi ginen berriro

lanean. 46an, beraz, Gobernuak argi berdea eman zuen eta ni atzerrira atera nintzen, eta hainbeste urte eta halakoxeen buruan aurreneko aldiz berriro ikusi nuen Jose Mari Lasarte. Pasaporte diplomatikoarekin atera nintzen, eh! Zeren eta, holako gauza bat antolatzeko ere, guztiz internazionala izan behar zuena, ez zegoen inora ateratzerik, ez zegoen hemen muga pasatzen zuen inor, normal esan nahi dut. Eta gertatu zen orduan, Secours Catholique-n Kongresu bat itze-la antolatu zutela Parisen, eta poloniarrak, txekiarrok, Europa guztiko jendeak bildu ziren, Kongresu guztiz interesante bat izan zen benetan, eta, jakina, era-bat-erabat irekia zen eta gomitatu egin behar izan zizuten Eliza espanola ere, ezta? Frantsesek nahi zuten Secours Catholique International-ak, hots, Caritas internazionalak Parisen edukitzea bere egoitza, eta helburu horrekin apailatu zuten Kongresua. Gobernuan MRP zegoen, etab. Baino gero Erroma tarteratu zen eta eragotzi egin zuen Caritas internazionala era horretan organizatzea. Erromak Erroman egongo zela erabaki zuen. Eta ni ilargitik erori den bat bezala joan nintzen, ideiarik ez neukan, batzuek susmoz begiratzen zidaten, zertara ote dator hau, zeinek bidali ote du, baina ezagupidea egin ahal izan nuen hainbat jenderena, hori zen nire egitekoa, benetan jende oso interesantea.

Gero Pax Christiko Idazkari Internazionala ere izan naiz. Pax Christi bakearen aldeko erakunde bat zen, eta kide batzuk nik Solasetara gomitatu nituen urte batean parte hartzen. Donostiako Solasak izugarria ziren informazio eta harreman sarea. Bake erakunde katoliko horren asmoa nolabait kontrapisia edo egitea zen, nik uste, Bakearen Mugimenduari, inspirazio komunistakoa —ezker ez zuen kontrapisatzen, jakina—, baina katoliko frantses batzuk ahaleginean ari ziren, testu batzuk ere argitaratu zitzuten bakeaz eta gerraz, interesanteak begitandu zitzakidan eta gomitatu egin nituen. Horrela, beraz, ezagutzen nituen. Eta erakunde hori ofizialtasun handikoa bihurtu zutenean, lehendakaria Parisko artzaezpiku Feltin kardinala izendatu zuten, 50ean izan zen hori, eta Idazkari Internazionala izatea eskaini zidaten niri. Pentsa, hilero joan-etorri bat Parisera! Egundoko mauka zen hori niretzat! Libre ibil nintekeen, edonora joaten nintzen, hamaika jende ikusten nuen, Irujo, Landaburu, Jose Antonio Agirre lehendakaria, jende asko ikusten nuen, gurea eta ez gurea.

Ni ez naiz politikaria, eta karguetan sartu banaiz, nire ideiekin kontsekuente ibiltzeko izan da. Nire ideietan benetan sinesten dudala erakusteko. Baino nire mundua batez ere kulturakoa izan da beti. Horregatik, ikastolak sortzen eta zabaltzen pozik lagundi dut. Badakizu, ez zegoen irakasle euskaldunik eta 64an «Andereñoen Erresidentzia» sortu genuen Donostian Jazinto Setien, Joxemiel Zumalabe eta hirurok, Manterola kalean, euskal irakasleak prestatzeko. Zortzi

andereñorekin bakarrik hasi zen, aurrenekoetan euskara lantzen zuten, laster, ordea, ikasle kopurua biziki goititu zen eta historia, geografia eta pedagogiako ikastaroak ere eskaini zituen. «Andereñoen Eskola» zeritzon orduan eta hainbat aldiz lokalez aldatu behar izan zuen, eskuartearen urriz, Aurrezki Kutxek ere ez zioten lagundu nahi izan-eta.

Enpeinuak eta burugogorkeriak atera du aurrera Santo Tomas Lizeoa ere. «Liceo Santo Tomás» izena nire emazteak asmatu zuen, «santu horren izenarekin ez dute pentsatuko eta begiratuko euskal gauzetan zabiltzatela», kontuz ibili beharra zegoen, inolako susmorik sortzea ez zegoen, eta Koldo Mitxelena, Joxemiel Zumalabe eta nik muntatu genuen dena, oroitarri bat ipini digute han orain. Lasartek ere bai, eta ez dago oroitarrian, ez da guztiz justiziazkoa hori. Egia da, bera Venezuelara joan zen eta geroxeago etorri zen berriro, baina berari eskerrak bideratu zen legezko parte dena, ezin burubidatzeko zirudiena, berak lan handia egin zuen. Beno, guk formula hau hartu genuen, legeak Segunda Enseñanza-n ikuskapenik exijitzen ez zuelako. Akademia libre baten gisakoak ginen eta ikaslek Institutura joaten ziren azterketak egiteko. Era honetan ikuskapenik ez genuen, hori zen importantea, hau da, nahi genuena egin genezakeen ordutegiarekin, metodoekin, etab. Baina zer ikara gurea, egun batez ikuskaria agertu zenean! Beno, lehenago, ikaragarri kosta zitzaigun abiatzea. Talde oso txiki batekin hasi ginen. Gainera, oso aipu handiko jendeak, abertzale aipuko familia sonatuak, alegia, umeekin esperimentua egiten ibiltzerik ez da goela-eta, entzun ere ez zuten egin nahi holako konturik. Hutsune totala egin ziguten. Halere, Joanito Goiari eskerrak noizbait hasi ginenean, hasi baginen —beno, Joanitok izugarritzko entusiasmoarekin hartu zuen idea eta, benga, autobusa organizatu eta han etorri zitzaigun bera Hernaniko ume talde batekin, eta Hernanikoei eskerrak hasi zen hau dena: bultzada honi eskerrak hasi, bada—, eta handik egun gutxira, hara non azaltzen den atarian ikuskari bat ikuskapena egitera. Hormak dena kartelez eta, pentsa, mundu guztia zalapartaka. Nondik demonio dator ikuskari hau?... Gertatu zen, guk «ingreso» ematen genuela, eta «ingreso» guk ez genekien Enseñanza Primaria zela eta ikuskapena zeukala. Joxemiel Zumalabek egin zion harrera. «Veo que tienen Uds. ahí unos textos en vascuence» eta hola hasi zen, etxea ikusi eta bazihoanean. «Sí, porque nosotros...», Zumalabek ez zekien nondik irten. «Me ha gustado muuucho!», bestea, «porque yo soy valenciano y en mi casa todos hablamos en valenciano». Alegia, gu dardara batean eta begira nondik, ikuskaria geure aldekoa suertatu.

Baina zertarako balio dizu honek guztiak? Huskeriak dira, ez du ezer balio. Zer atera behar duzu hemendik?